

Monday, October 27, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

TERRITORIAL ARMY

Mizoram-a hmasa ber atan Territorial Army (Home & Hearth)-a tang turte lakna chu November ni 15 atanga November ni 25 inkar hian Rajiv Gandhi Stadium, Aizawl-ah neih a ni dawn a, a vawikhatna atan hmeichhia-te tan Territorial Army-a an luh theihna tur a ni bawk.

He thu hi State Level Committee on Territorial Army Coordination and Establishment chairman Lt. Col. Clement Lalhmingthanga chuan vawiina PHQ Conference Hall-a chanchinbumite a kawmnaah sawiin, he hna lakna hi Mizoram Sorkar leh Assam tangkawpin an buaipui dawn a, a vawikhatna atan hmeichhia-te tan Territorial Army (Home & Hearth)-a an luh theihna tur a ni a. Territorial Army post 144 General Duty lak turah post 9 chu hmechhiate tana hauhsak a ni.

Lt. Col. Clement Lalhmingthanga chuan he hna lak tur hi Mizoram tana mellung pawimawh tak a ni tih sawiin, Mizo thalai hmeichhia leh mipa te chu ram leilung fa an nih anga mahni ram tana thawk a, venghim tura atana ke an pen ve theihna tur kawng hawnsak chu a tum ber pakhat a ni a ti a. Territorial Army atana lakte chuan Indian Army uniform nen chhuanawm taka ram tana hnathawkin, Indian Army te angin hlawh leh hamthatna bakah damdawia inenkawlna an dawng a ti a. An hnathawh that dan leh mawmawh dan a zirin Territorial Army te chu hun rei zawk atana chhawr theih leh hamthana hrang hrang Sorkar ruahman anga pek zui zel tur an ni a. An hnathawh tur hun chhung thawk zo te chu pension leh hmamthatna hrang hrang bakah India damchhungin an hlawh tawh dawn a. Tunah hian Sorkar Laipui chu 8th Central Pay Commission hman turin a inbuatsaih mek a, hei hian Territorial Army te hlawh leh hamthatna pawh a belhchhah dawn a ni a ti a. Mizo thalai, hmeichhia leh mipa Territorial Army dil thei zawng zawng te chu hun tha bawhpel lo turin a chah a ni.



90TH ANNIVERSARY OF MZP

MZP President Dr. C. Lalremruata'n MZP chu hrechiang lova nuihsawh leh beitu an tam tih sawiin, heng mite hi sorkar hna a dik lo taka lut te, hnamdang sumdawng mawngzawmpuia hlawkna tel ve te leh an chhungte an ni duh tlangpui tih a sawi.

He thu hi vawiina Zirlaite ni leh MZP kum 90-na lawmna I&PR Auditorium a neihah sawiin, MZP President Dr C. Lalremruata chuan MZP chu hrechiang lova social media-a nuihsawh leh beitu an tam tih sawiin, vawikhatmah MZP constitution la chhiar loten MZP in an kuang lo an nawr titu chu sorkar hna a dik lo taka lut MZP in bang tura an nawrte, hnamdang sumdawng mawngzawmpuia hlawkna tel ve te leh an chhungte an ni duh tlangpui a ti a. MZP hrechiang lova nasa taka beitude chu pawn lam atanga MZP en lova a chhung ngeia en turin a sawm a, MZP chu zirlai

pawl a nih angin zirna an ngaipawimawh tur a nih rualin nationalism an buaipui lo a nih chuan MZP chu engtikahmah a sang ngai dawn lo a ti a, zirna leh nationalism chu Mizo Zirlai Pawl innghahna, a lungphum a ni a, rualkhai taka a kal zel theih nan theihtawpa hmalak a tul hle a ni a ti.

Byte: MZP President Dr. C. Lalremruata

Education Minister Dr. Vanlalhlana pawhin MZP din champhaphak vawi 90-na leh Zirlaite Ni pualin Mizoram chhung leh pawna zirlai zawng zawngte chu an zirna kawngah Pathian malsawmna an dawn zel theihnan duhsakna hlanin chibai a buk a, zirlaite chu rilru hriselna tha tak nei tura chahin ruihhlo leh zuk leh hmuam laka insum turin a chah a, zirlaite chu ram leh hnam hmakhua an nih avangin rilru leh taksa hrisel tak nei turin a chah a ni.



VIGILANCE AWARENESS WEEK

Vigilance Awareness Week, 2025 pualin vawiin khan Sawrkar pisa hrang hrangah Vigilance Awareness Week thutiam an sawi rual a, Kumina thupui hi 'Vigilance : Our Shared Responsibility' tih a ni.

Akashvani Aizawl-a thawktute chuan Director leh Mizoram Cluster Head Pu DR Lalropuia hovin an pisa Tuikhuahtlangah Vigilance Awareness Week thutiam an sawi rual a, Mizoram sawrkar pisa hrang hrangah pawh thutiam hi sawi rual a ni.

Chief Minister Pu Lalduhoma chuan vawiin Thawhtanni atanga Pathianni thlenga hman tur Vigilance Awareness Week, 2025 puala a thuchahah Mizoram chu Lakshadweep dawta eirukna tlemna berna state a nih thu a sawi a, Vigilance Awareness Week chu Hrui khat vuana eirukna leh hlemhletna do tura mipuite zirtir na’na hman thin a nih thu a sawi a. Mizoram sorkar Vigilance department pawhin kum 2018 atangin kumtin he hapta hi a hman thin thu a sawi a. Chief Minister chuan eirukna chu hmasawmna daltu, mipuiten an chanvo dik an chan theihlohna bul, Pathian huat zawng a nih thu a sawi a. Mahni chhungkua theuhah eirukna do hna huai taka kalpui tur leh eirukna sum atanga lei thil reng reng duh lo ngam turin mipuite a sawm a ni.

Pu Lalduhoma chuan eirukna laka fihlim theihna turin sorkar laipuiin a siam thu leh sorkar hnathawkte chu CSS Conduct Rules, 1964 danin a phuar thu a sawi a. Prevention of Corruption Act, 1988 hnuai-ah Anti Corruption Bureau leh Mizoram Lokayukta din a ni tawh tih sawiin kumin chhungin eirukna leh a kaihnawih thilah ACB chu preliminary inquiry tih phalna 10 pek a nih tawh thu leh regular case siam phalna 5 pek an nih tawh thu a sawi a. Transparency International leh NITI Aayog data behchhana CMS India Corruption Study in a hmuhchhuah danin Mizoram chu Lakshadweep dawta eirukna tlemna ber state a nih thu leh thil chhinchhiah tlak leh chhuanawm tak a nih thu a sawi ni.



GST REFORMS CHAMPHAI

Thla liam ta September ni 22 atanga GST dan thar hman a nih hnuah Champhaia sumdawng lian zawk ten GST dan thar an zawm tha hle.

Champhaia kan Correspondent in Deputy Commissioner of State Tax, Champhai Zone Pu David TS Zova a kawmna ah GST dan thar chu sumdawng lian te an zawm tha hle nia a hriat thu a sawi a, GST registration nei leh nei lovah thil man a nghawng dan a inan loh avangin dawrkai zawng zawngah thil man a tlakhniam phah vek rih lo a ti a. Stock thar an zawrh vek hunah erawh sumdawng ten rate thar angin thil an hralh vek tawh dawn tih a sawi.

Pu David TS Zova chuan GST rate thar hman hnuah survey an nei tih sawiin Rate hniam tur tihniam lote pawh tihniam nghal turin an hrih a ti a, Sumdawng thenkhat chuan a chhut dan an thiam loh vang leh a rate thar an hriat chian loh avanga tihniam dan tur chin an hriat loh thu an sawiin heng sumdawngte hi a chhut dan tur an zirtir bakah an hralhna man turte pawh bungraw panga ziah thatsak te pawh an nei tih a sawi a ni.

Champhai Zone ah hian sumdawngten mipuiin chhiah an pek khawmte kim taka Sawrkara an chhun luh theihna turin cheng 200 man aia tam an inhralhna bungruaah chuan tax invoice an pek vek theihna turin tax invoice siam dan training an lo pe tawh a. Tax invoice pek thiam loh chu chhuanlam a tling tawh lo niin a sawi a. Hemi zawm lo an hmuh chhuah tawh sumdawng mi 24-te hnenah hremna cheng sing hnih theuh chawi turin lehkha an pek tawh thu a sawi a ni.

Taxation, Champhai Zone hian kum 2025-26 hian target cheng Nuai 965 leh sing 6 an nei a. September thla tawp thlenga an lakluh tawh zat chu cheng Nuai 924 sing 9 sang 2 za pahnih a ni a. An target atanga 95.79% an lalut tawh a ni.

